

فراق

حاسس بانك نهر
مسيت ضفافه
من غير ما شوف وشي ف مرايته
ولا ابل ريمي
وارتوي.

مسافه طلعت بيتا فجأه
من الشكوك الغبيه
الماشيه وحيده تعيط
بندم
جنب الحيط.

محتار بين اني ألوم نفسي
أو اکتفي بطعنة غدر
بتبصلي بشماته
وهدوء راجل مجنون
قرر ينتحر .

محتار بين إني أصالحك
وارجع من تاني
مجنوب بيكي
أو بين إني أطنش
وابعد خالص
واحمل غليانك ف عروقي
وريحة قمصان نومك
اللي بتدخل تحت غطايا
قبل النوم.

أحياناً يتهيا لي
إنك جنبي ف كرسي الأتوبيس
أو ف كتاب
أو ع الصفحة الأولى
ف مجله حزينه
أو بتعدّي مصادفه
ف جملة اعتراضيه
محذوفه من النص.

مقدرش أقولك تاني
.. يا حبيبتى ..
كأن بينا قتيل
أو كإني سكران نسي ضله
ف شارع ضلمه ..
مقدرش أقولها
أو ابعثالك ف جواب
أو احدفها لك م البلكونه

لإني مش عايز أشوفك
وارمي نفسي ف عنيك
أو اتهجاكي كلمه كلمه
وعضو عضو
وشعره شعره
ونا ماشي بكلم نفسي
قدّام الفتارين
ف وسط البلد.

وكمان مش عايز اخرج عن شعوري
أو عن الخطوط اللي رسمناها لبعض
بحكمه وجبن
جيل ورا جيل
وخيبه ورا خيبه.

وكمان مضطر استنى شويه
قبل ما افتح قبر بحجمك
يمكن ألاقي حلول حديثه
موجوده ف فانوسي السحري
المتعلق بخمول
جنب البدله البني
ف الدرغه اليمين.

مش عارف ليه لما نحب
بتكون قسوتنا
أكثر من رقتنا
وبنصنع أوهام حقيقيه
نتسابق ليها
بنفس السرعه اللي بتمر بيها
لحظات عشق حميمه
نسيناها امبارح
جنب الأباجوره الحمراء.

مش عايز آخذ صورته تذكاريه
مع الأثم النائم ف عنيا
أو مع الحاجات المتكسره ف نفسي
اللي بتتوحد كل ليله
مع الكوابيس المستنياني
تحت المخده.

مارس ٢٠٠٣